

Spørsmål og svar om mellombels innførsel av russiskregistrerte bilar

Sist oppdatert: 4. oktober 2023

Kva inneberer presiseringa?

Import av bilar og motorkøyretøy som høyrer innunder tolltariffens kapittel 8703 frå Russland eller med opphav i Russland er allereie forbode. Presiseringa inneber mellom anna at slike russiskregistrerte bilar ikkje lenger kan førast inn i Noreg, heller ikkje på mellombels basis. Døme på dette er turisme, besøk, handleturar, pendling eller andre arbeidsreiser. Noreg innfører samtidig nokre unntak som opnar for mellombels innførsel av slike bilar(?).

Presiseringa er retta mot transportmiddelet som blir brukt, og *ikkje* personane som bruker transportmiddelet. Det er framleis tillate for russiske statsborgarar med gyldig visum og grenseboarbevis å kome til Noreg (såframt dei ikkje er sanksjonerte), men dei må nytte andre transportmiddel enn russiskregistrerte bilar og motorkøyretøy som høyrer innunder tolltariffens kapittel 8703. Sjølv om eit køyretøy er omfatta av eitt av unntaka for mellombels innførsel, inneber ikkje det at personane i bilen automatisk får reise inn til Noreg.

Kva slags bilar er omfatta av presiseringa?

Presiseringa av restriksjonane inneber mellom anna at russiskregistrerte bilar og andre motorkøyretøy i tolltariffens kapittel 8703 ikkje lenger kan førast inn i Noreg, heller ikkje ved mellombels innførsel. Tolltariffens kapittel 8703 omfatta bilar og andre motorkøyretøy hovudsakeleg konstruert for transport av personar som ikkje høyrer inn under tolltariffens kapittel 8702. Til dømes vil stasjonsvogner, racerbilar, bubilar og snøskutere vere omfatta.

Motorkøyretøy for transport av ti eller fleire personar, inkludert føraren, er omfatta av tolltariffens kapittel 8702, og er ikkje omfatta av importforbodet. Presiseringa gjeld såleis ikkje bussar eller minibussar med ti eller fleire sete.

Importforbodet omfatta også varebilar som fell under tolltariffens kapittel 8704. For fullstendig oversikt over alle varar inkludert køyretøy som er omfatta av importforbodet, sjå nærare i lista i forskriftas [vedlegg XXI](#).

Kan eg ta en russisk buss frå Russland til Noreg?

Ja. Bussar og minibussar med ti eller fleire sete er ikkje omfatta av importforbod.

Finst det unntak frå importforbodet?

Ja. Det er fire unntak frå importforbodet knytta til mellombels innføring av russiskregistrerte bilar og motorkøyretøy i tolltariffens kapittel 8703:

Det vert til dømes innført unntak for diplomatiske køyretøy og køyretøy som høyrer til internasjonale organisasjonar eller ein stats kurerteneste.

Det vert innført unntak for køyretøy som er eigd av ein statsborgar av Noreg eller eit anna EØS-land med fast bustad i Russland, eller nære familiemedlemmer til statsborgaren. Nære familiemedlemmer tyder her ektefelle, registrert partner, sambuar, barn og foreldre.

Det vert innført unntak for mellombels innførsel av køyretøy som er nødvendig av humanitære grunnar. Døme på dette er akutt sjukdom, dødsfall eller gravferd i familie.

I tillegg kan ein søkje unntak hjå Utanriksdepartementet i særlege tilfelle der utanrikspolitiske omsyn tilseier det.

Eg er norsk statsborgar og bur i Russland. Kan eg besøke Noreg i min russiskregistrerte bil?

Ja. Det er fastsett unntak for køyretøy som er eigd av ein norsk statsborgar med fast bustad i Russland eller statsborgaren sitt nære familiemedlem. Nære familiemedlemar tyder her ektefelle, registrert partner, sambuar, barn og foreldre.

Eg er statsborgar frå eit EØS-land og bur i Russland. Kan eg besøke Noreg i min russiskregistrerte bil?

Ja. Det er fastsett unntak for køyretøy som er eigd av ein EØS-borgar med fast bustad i Russland eller EØS-borgaren sitt nære familiemedlem. Nære familiemedlemmer tyder her ektefelle, registrert partner, sambuar, barn og foreldre.

Eg er russisk statsborgar og bur i Russland. Kan eg mellombels ta med min russiskregistrerte bil til Noreg?

Nei, ikkje om bilen fell under tolltariffens kapittel 8703. Det er berre mogleg å dra til Noreg med bilen din dersom eitt av unntaka gjeld for reisa di.

Eg er russisk statsborgar og bur i Noreg. Kan eg mellombels ta med min russiskregistrerte bil til Noreg?

Nei, ikkje om bilen fell under tolltariffens kapittel 8703. Det er berre mogleg å dra til Noreg med bilen din dersom eitt av unntaka gjeld for reisa di.

Eg er russisk statsborgar. Eg bur i Russland, men mi norske ektefelle bur i Noreg. Kan eg passere grensa til Noreg med min russiskregistrerte bil?

Nei, ikkje om bilen fell under tolltariffens kapittel 8703. Det er berre mogleg å dra til Noreg med bilen din dersom eitt av unntaka gjeld for reisa di. Du kan likevel passere grensa i til dømes ein norskregistrert bil, buss eller minibuss.

Eg har dobbelt statsborgarskap, norsk og russisk, og bur i Russland. Kan eg passere grensa til Noreg med min russiskregistrerte bil.

Ja. Det er fastsett unntak for køyretøy som er eigd av ein norsk statsborgar med fast bustad i Russland eller statsborgaren sitt familiemedlem. Det har ikkje noko å seie at du òg har russisk statsborgarskap.

Eg er norsk og bur i Noreg. Eg vil gjerne køyre i Noreg med ein russiskregistrert bil som er eigd av min russiske ektefelle. Kan eg køyre bilen til Noreg?

Nei, ikkje om bilen fell under tolltariffens kapittel 8703. Forbodet gir berre unntak for køyretøy som eigas av norsk statsborgar med fast bustad i Russland, eller statsborgaren sitt nære familiemedlem.

Eg er russisk statsborgar og bur i Noreg med min ektefelle. Kan eg ta med meg min russiskregistrerte bil etter å ha vore på besøk i Russland?

Nei, ikkje om bilen fell under tolltariffens kapittel 8703. Det er lagt til grunn at russiske statsborgarar som bur fast i Noreg har norskregistrert bil.

Eg er russisk statsborgar og bur i Russland. Barnet mitt bur i Noreg. Kan eg køyre min russiskregistrerte bil for å besøke barnet mitt?

Nei, ikkje om bilen fell under tolltariffens kapittel 8703. Det er berre mogleg å dra til Noreg med bilen din dersom eitt av unntaka gjeld for reisa di. Du kan likevel passere grensa i til dømes ein norskregistrert bil, bil registrert i eit anna land enn Russland, buss eller minibuss.

Eg er russisk statsborgar og bur i Russland. Eg har familie i Noreg. Kan eg køyre min russiskregistrerte bil til Noreg i naudstilfelle, til dømes ved akutt sjukdom i familien?

Ja. Det er gjort unntak for mellombels innførsel av køyretøy som er naudsynt av humanitære grunnar, til dømes akutt sjukdom, dødsfall eller gravferd i familie. Du må kunne dokumentere på grensa at du må innføre køyretøyet mellombels av humanitære grunnar. Dersom du kan oppnå formålet med besøket med annan transport, til dømes buss, vil ikkje vilkåret «naudsynt» vere oppfylt.

Eg arrangerer transport for bytte av russisk mannskap på russiske fiskefartøy som har unntak frå hamneforbodet og fartøy frå andre land. Kan slikt mannskap nytta russiskregistrerte bilar for å komme seg til hamna?

Nei, dei kan ikkje nytte russiskregistrerte bilar som fell under tolltariffens kapittel 8703. Dei kan anten ta buss, minibuss med ti eller fleire sete eller bilar registrerte i Noreg eller andre land enn Russland.

Eg er russisk grensebuar. Kan eg køyre til Noreg i min russiskregistrerte bil?

Nei, ikkje om bilen fell under tolltariffens kapittel 8703. Det er berre mogleg å dra til Noreg med bilen din dersom eitt av unntaka gjeld for reisa di. Du kan likevel passere grensa i til dømes ein norskregistrert bil, bil registrert i eit anna land enn Russland, buss eller minibuss.

Kan eg importere ein bil frå Russland eller som har russisk opphav?

Nei. Den nye presiseringa endrar ikkje regelen i Ukraina-forskrifta § 17g og vedlegg XXI som allereie forbyr kjøp, import og overføring av mellom anna bilar som vert eksportert frå Russland eller har russisk opphav.

Kor kan eg få svar på andre spørsmål om tolkinga av forbodet?

Du kan sende spørsmålet ditt til sanksjoner@mfa.no.

Alle i Noreg har ei sjølvstendig plikt til å overhalda dei til ei kvar tid gjeldande sanksjonane. Utanriksdepartementet ber derfor alle om å setje seg godt inn i regelverket. UD vil ikkje kunne gi konkret juridisk rådgiving, men kan gi rettleiing om korleis sanksjonane skal forståast. Me forventar at alle gjer egne vurderingar knytt til regelverket og søker ekstern juridisk bistand ved behov. Ved førespurnader til Utanriksdepartementet må det leggjast ved ei eigen vurdering der det kjem fram kva vurderingar ein sjølv har gjennomført.